

Jumaat, 9 Julai 2021, 4:20pm

Pahang perlu teliti inisiatif Sempadan Hijau Negeri

Oleh [Asrol Awang](#) - Julai 7, 2021 @ 6:51pm
bhnews@bh.com.my



Pemangku Raja Pahang, Tengku Hassanal Ibrahim Alam Shah Al-Sultan Abdullah Ri'ayatuddin Al-Mustafa Billah Shah

KUANTAN: Pemangku Raja Pahang, Tengku Hassanal Ibrahim Alam Shah Al-Sultan Abdullah Ri'ayatuddin Al-Mustafa Billah Shah meminta Kerajaan Pahang meneliti inisiatif Sempadan Hijau Negeri membabitkan kawasan sempadan negeri merangkumi keluasan 54,350 hektar.

Pengelola Bijaya Diraja Sultan Pahang, Datuk Ahmad Khirrizal Ab Rahman, berkata baginda bertitah sebahagian besar kawasan itu perlu diwartakan sebagai Hutan Simpan Kekal (HSK),

manakala kawasan tanah milik pula dibangunkan secara lestari selaras konsep Alam Sekitar-Sosial-Tadbir Urus (ESG).

Katanya, baginda bertitah kawasan itu perlu menjadi kawasan perlindungan bagi hidupan liar, flora dan fauna sepenuhnya.

"Baginda mengutuk aktiviti pemburuan haram di Pahang dan bertitah Jabatan Perlindungan Hidupan Liar dan Taman Negara (PERHILITAN) perlu menjalankan penguatkuasaan lebih tegas bagi terus melindungi hidupan liar di negeri ini.

"Baginda bertitah kawasan strategik bagi hidupan liar, flora dan fauna seperti Taman Negara, Taman Negeri Endau Rompin, hutan lipur dan hutan rimba, Tasik Chini serta Tasik Bera, Bukit Fraser, gunung-ganang, kawasan gua, kawasan tadahan air dan sungai, pantai serta pulau dan kawasan penempatan Orang Asli terus kekal dipelihara," katanya dalam kenyataan media di sini, hari ini.

Justeru, beliau berkata, baginda meminta kerajaan negeri menggiatkan usaha mengenal pasti sumber alternatif, selain aktiviti pembalakan dan perlombongan sebagai hasil baharu kepada kerajaan negeri.

"Baginda mengalu-alukan semua pihak berminat melabur di Pahang membawa idea baharu yang selari dengan konsep ESG," katanya.

Berhubung langkah pemuliharaan Kawasan Rizab Biosfera UNESCO Tasik Chini, beliau berkata, baginda mengadakan perbincangan bersama kerajaan negeri dan Pusat Penyelidikan Tasik Chini (PPTC) Universiti Kebangsaan Malaysia (UKM).

"Baginda bertitah usaha pemulihan kawasan itu dengan penanaman pokok yang bersesuaian perlu disegerakan," katanya.